

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. ONG KIAN MING  
[ BANGI ]**

**TARIKH : 20 SEPTEMBER 2021 (ISNIN)**

**SOALAN**

Minta **MENTERI PENGAJIAN TINGGI** menyatakan status terkini mengenai program-program di Limkokwing University of Creative Technology (LUCT) yang mana pentauliahannya telah ditarik oleh MQA dan apa yang telah dilakukan untuk membantu para pelajar yang terlibat.

**JAWAPAN**

Tuan Yang di-Pertua,

Pihak Limkokwing University of Creative Technology (LUCT) didapati tidak mematuhi keperluan standard yang telah ditetapkan dan gagal mengekalkan kualiti terhadap beberapa kursus pengajian. Sehubungan dengan itu, perakuan akreditasi penuh telah ditarik balik oleh Agensi Kelayakan Malaysia (MQA) pada 29 September 2020 berdasarkan prosedur yang telah ditetapkan.

Dalam mencari jalan penyelesaian bersesuaian dengan peruntukan akta sedia ada, pada 14 Julai 2021, KPT telah bermesyuarat bersama MQA,

## SOALAN NO: 36

Education Malaysia Global Service (EMGS) dan LUCT untuk mengenal pasti tindakan-tindakan yang perlu diambil bagi membantu pelajar LUCT yang terkesan. Menyantuni kebajikan pelajar-pelajar tersebut, KPT telah mengesyorkan beberapa cadangan kepada pihak LUCT untuk:

- i. Membuat permohonan semula akreditasi penuh dalam kadar segera kepada MQA dengan penambahbaikan terhadap isu jaminan kualiti program bagi program-program terlibat;
- ii. Mengadakan sesi penerangan kepada pelajar-pelajar yang terkesan berhubung dengan situasi terkini dan cadangan penyelesaian yang akan diambil bagi memastikan pengajian mereka tidak terjejas;
- iii. Membuat pemetaan kursus bagi pelajar yang berhasrat untuk berpindah ke program lain dengan mendapat pengesahan MQA terlebih dahulu bagi memastikan tindakan yang diambil mengikut prosedur yang ditetapkan; dan
- iv. Mengambil tindakan segera terhadap pelajar-pelajar antarabangsa dengan membuat pelanjutan atau mendaftar semula agar pas pelajar yang diguna pakai adalah sah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN** : **LISAN**  
**DARIPADA** : **Y.B. TUAN YUSUF BIN ABD. WAHAB**  
**[TANJONG MANIS]**  
**TARIKH** : **20 SEPTEMBER 2021 (ISNIN)**

**SOALAN**

**Tuan Yusuf Bin Abd. Wahab [ Tanjung Manis ]** minta **MENTERI KEWANGAN** menyatakan untuk mewujudkan *ATM Mobile Banking* di kawasan Pulau Brait dan Bandar Baru Tanjung Manis. Penduduk di kawasan ini sangat terkesan kerana ketiadaan mesin ATM semasa sekatan PKP yang lepas kerana jarak perjalanan ke bank terdekat adalah terlalu jauh dan membebankan penduduk.

## **JAWAPAN**

Tuan Yang di-Pertua,

1. Untuk makluman Ahli Yang Berhormat, pada masa ini, terdapat sebuah cawangan institusi kewangan pembangunan, iaitu Agrobank dan tiga buah ejen Bank Simpanan Nasional (BSN) yang menyediakan perkhidmatan perbankan asas kepada penduduk di sekitar mukim Daro, Sarawak. Di mukim Belawai pula, terdapat empat buah ejen BSN dan sebuah ejen Agrobank yang menawarkan perkhidmatan perbankan asas.
2. Secara amnya, melalui penggunaan perbankan ejen, pengguna boleh menjalankan transaksi pengeluaran wang dan deposit, sama seperti penggunaan mesin juruwang automatik (*Automated Teller Machine*, ATM) dan/atau mesin deposit tunai (*Cash Deposit Machine*, CDM) serta khidmat pemindahan dana, pembukaan akaun, pembayaran balik pembiayaan dan pembayaran bil utiliti.
3. Di samping itu, institusi kewangan juga memantau tahap penggunaan perkhidmatan perbankan di ejen-ejen bank oleh penduduk setempat sebagai justifikasi bagi penambahan kemudahan perkhidmatan kewangan seperti ATM dan/atau pembukaan sesebuah cawangan bank.
4. Dalam usaha untuk meningkatkan rangkuman kewangan dan menambah baik penyediaan kemudahan akses perkhidmatan kewangan di kawasan luar bandar dan pedalaman, Kerajaan Negeri Sarawak bekerjasama dengan Bank Negara Malaysia (BNM), Agrobank, Bank Rakyat, BSN dan beberapa institusi kewangan lain telah menyediakan Perkhidmatan Bank Bergerak yang dilengkapi dengan Mesin ATM MEPS ke kawasan luar bandar dan pedalaman Sarawak mulai tahun ini.
5. Dalam masa yang sama, Kementerian Kewangan dan institusi perbankan amat menggalakkan penggunaan perkhidmatan kewangan yang berasaskan teknologi dan digital, seperti

perbankan internet dan mudah alih, dan e-dompet, di mana transaksi perbankan boleh dilakukan di mana-mana dan pada bila-bila masa sahaja secara selamat, cepat dan mudah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. MUJAHID BIN YUSOF  
RAWA [ PARIT BUNTAR ]**

**TARIKH : 20 SEPTEMBER 2021 (ISNIN)**

**SOALAN**

**DATUK SERI DR. MUJAHID BIN YUSOF RAWA** minta **MENTERI KANAN PENDIDIKAN** menyatakan menjelaskan berapa jumlah kos yang ditanggung oleh guru dalam masa sebulan melaksanakan Pengajaran dan Pembelajaran di Rumah (PdPR) kepada murid-murid dan, adakah Kementerian bercadang memberikan elaun PdPR kepada guru bagi meringankan kos yang ditanggung guru-guru yang melaksanakan PdPR.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa terdapat kekangan dalam kalangan guru, murid dan ibu bapa bagi melaksanakan Pengajaran dan Pembelajaran di Rumah (PdPR). Oleh itu, KPM sentiasa menekankan bahawa kaedah pelaksanaan PdPR haruslah mengikut kesesuaian guru dan murid.

Bagi meringankan kos yang ditanggung guru dalam melaksanakan PdPR, KPM menyediakan kemudahan untuk guru menggunakan bahan atau alat cetak dan alat bantu mengajar yang terdapat di sekolah. Selain itu juga, KPM menyediakan Bantuan Geran Per Kapita (PCG) bagi menampung kos bahan-bahan PdP dalam pelaksanaan PdPR. Bagi tahun 2021, sebanyak RM564,397,600 PCG telah disalurkan kepada sekolah.